

von Wulf Wager

Dr Trump(el)



Noch dr gscheiterta Revolutio 1848/49 send viele demokratisch gesinnte Landsleut noch Amerika ausgewandert, obwohl dr Kenig Wilhelm I. eigentlich a ganz guadr Herrscher war, der neamrd ebbes z' Loid doa hot. Em Gegatoil. Er hot viel Sega ond behutsame Modernität en's Ländle brocht. Hondert Johr später hend ons dia Amerikaner mit de Alliierte zsamma von dem öscherreichischa braune Teifel befreit.


Aber zur Zeit machat die Amis koi guads Bild en dr Welt, ond des liegt hauptsächlich an dem, was durch da Präsidenschaftswahlkampf do driebe, z' Amerika abglieftrat wird. „Wem Gott ein Amt gibt, dem gibt er auch Verstand“, hoißt's em a alda Sprichwort. Aber scheinbar kennt onser Herrgott dia Amerikaner net. Die wörtliche Ibrsetzung von „Bisch et ganz sauber, Kerle?“ en's Amerikanische hoißt: „Are you Trump?!“

So en drecketa Wahlkampf wie dieba z' Amerika han i no nia erlebt. Jetzt, wo i dia Kolumne schreib, isch no net klar, wer den Wahlkampf gwonna hot. Wenn ihr dia lesat aber scho. Aber wia's au ausgoht, verlora hot dr A'stand, d' Moral, 's menschliche Mitander, ond 's weltweite A'seha von de Amerikaner. Net wer 's meischte Geld hot, dia meischte Waffa en d' Welt liefert ond da graischte Einfluss auf die Weltkonzerne ond Banka hot, sott 's graischte A'seha ond de graischt Macht han, sondern dia Präsidenta ond Religionsführer, wo da Frieda auf d' Welt brengat.

Apropos Amerika: 1492 send zwoi weltbewegende Dinge en dr Welt passiert. Dr Chrischtofer Kolumbus (der jo en Schwob war, wie mir alle wissat) hot Amerika entdeckt. Was draus worda isch, kennat'r jo jetzt seha. Ond en Württemberg hot der Graf Eberhard mit em Stuttgarter Stadtrecht die Kehrwoch ei'gführt. Jetzt frag i: Was hot sich bewährt?

Bis näggschd Woch

Ihr



Alle Kolumna zom nochlesa ondr: www.woascht.de